

編號 1 號

【自家大自家】林伯殷原作

該個人係麼儕？仰會電視逐日有佢个新聞？仰會有恁多人請佢簽名？仰會有恁多人聽佢演講？係哪齣電影个明星？係哪個有名个歌星？抑係哪種職業運動个球星？全毋係。佢係一間有名公司个執行長，來臺灣摻大家分享人工智慧个發展，同時，也有其他重要晶片公司个執行長，來參加臺北電腦展个活動。仰般佢兜會跔跔對外國來到臺灣呢？當然有理由啊！該就係，臺灣有全世界最先進、最完整个晶片製造系統。

在世界晶片个分工系統肚，臺灣最強个部分係晶片製造，差毋多，最新設計个晶片，全部係交分臺灣來生產。現代晶片个發展係越做越幼秀，功能越來越強。晶片製造公司為著愛開發新个製造技術，長下會投資大量資金，集合幾下百、甚至幾下千儕來做研究，就係講，愛大自家為共同个目標來打拚正有法度做得著，這摻單淨倚恃自家煞猛做頭路來講，有當大个爭差。

所以，有名个晶片公司執行長毋會斯強調自家公司產品个成功定定，還會記得承蒙好得有臺灣恁湛斗、恁有紀律个晶片生產團隊來幫襯。見擺上下班時間，想著該恁多在科學園區來來去去

个人，就知，係無大自家个努力，臺灣仰會有恁好个晶片製造能力，仰會受著國際个恁多肯定。

隨等晶片个用量緊來緊大，恁多年來，幾多原旦係客家人耕種个山林、農田，既經變做電子廠摻大樓，想看一下頭播播做事个農家人，來思念自家个長輩斯無恁該。毋過，這種自家認分，頭播播摻事情做好，堅耐个精神，對農業時代變到資訊時代後並無失忒去，像人乜毋識離開過原來个所在，還係日合夜繼續留在廠房裡肚。這兜摻臺灣合作个晶片公司執行長，認為自家堅耐个傳統，就係臺灣晶片製造个正經基礎。

現代工業產品已經離毋開晶片咧，臺灣个晶片公司乜有去到美國、日本、德國等先進國家設廠，偲俚个工程師跔等去到世界各地，大自家摻晶片製造技術傳揚出去个時節，乜分人更加有機會做得來感受著臺灣人自家个堅耐精神。

編號 2 號

【坐米籬沾屎朏】徐姿華原作

頭擺，阿爸在河壩埔有一埕地，種枇杷膠鸚哥桃，還有幾下個莊肚个阿叔、阿伯也在該種兜楊桃、葡萄、李仔這兜。

河壩个枇杷園較平洋，好做事，毋過，愛去河壩園還有一隻挑戰，斯係愛坐流籠¹過河壩；河壩水又大又急，有三、四十公尺闊，這兜阿叔、阿伯也識探²過幾下擺竹笕橋，毋使幾久橋斯會分水打走。高不將，大家出錢出力拉一條鋼索做流籠，正起勢係用大米籬絹麻索，再過秦鐵線圈做流籠，還愛用人出力拉，背尾，正改用電動个白鐵籃流籠。

第一擺坐流籠又驚又好，阿爸先溜過河壩埔該向，阿姆膠流籠拉轉來，揪核索仔喊佢落米籬肚坐好，再過膠做事愛用著个傢啦伙、水膠飯包，做下放落米籬肚，斯膠阿爸攞手，順勢膠米籬搥出去。該流籠溜當遽，一下斯溜到河壩中央，佢著驚一下，噉到大嫲牯聲，阿爸續等出力擲，膠佢擲到佢个身邊。等嚇到面壠青个佢踏出米籬，又膠東西拿掣了後，換阿爸膠阿姆攞手，阿姆

膠流籠拉轉去，正坐落流籠膠阿爸兩片向搥拉，當遽斯過河壩咧。

萬事起頭難，有經驗了後，佢个膽斯較在咧，曉得享受坐流籠个趣味咧！該咻一聲，斯溜到一、二十公尺遠个刺激，可比這下个雲霄飛車。去河壩園搥手，有好坐兩輪³流籠，這係分佢最好个獎勵。

熱天个下晝頭，輒輒會打風時，水若係較早落，佢兜斯歇睏一下等水停正過做，若係水較暗正落，阿爸斯會放工轉早夜。有一擺，四點空落大水，阿爸看做毋成事咧，斯喊大家收收仔，愛轉咧！

去到流籠前，堵著核等葡萄个阿平叔，地泥下還放等一擔，佢本成按算自家拉四輪流籠，膠葡萄載轉屋下，熱心个阿爸斯膠佢搥手，一儕膠一籠葡萄共下坐過河壩。水緊落，河壩水緊漲起來，大人企在大米籬肚緊拉索仔過河壩；換佢愛過河壩咧，阿姆喊佢愛坐好。到河壩中央，水嘎浸著米籬底，佢个屎朏一下仔斯沾著該冰冰涼涼个河壩水。看等該黃貢貢个大浪拋等來，實在還得人驚，佢忍等毋敢噉，當無簡單正耐到岸脣。

這下想起該坐米籬沾屎朏个事情，又好笑又心酸。阿姆講該兩時，等在流籠前个佢，乜驚佢分水打走，硬硬嚇到殷忒一層皮咧！

¹ 流籠：音 liu long；一種以滑輪和纜繩或鋼纜為主要構件，可橫越河川或山谷等地形的運輸工具。

² 探：音 tam+；架設、搭建。

³ 輪：音 lin`；量詞，次。

編號 3 號

【目汁个故事】徐秀英原作

該日下晝，看著一張當錫人个圖像——顯微鏡底下个目汁花。逐張目汁花看起來斯像一隻細星球，頂高个花紋逐隻斯無共樣，有像雪花形个，有像石英結晶體个，也有像弄毛蟲个，又神奇又得人惜。攝影个作者講，逐滴个目汁，用目珠看起來都係晶亮晶亮，毋過在顯微鏡底下，喜怒哀樂个情緒變化都會出現無共樣个目汁花。對看著這篇文章以後，逐擺看著人出目汁，就會緊想佢背後个故事。

佢係一個「噉點」當低个人，歡喜會流目汁、感動會跌目汁；當閤个時節會噉、悲傷个時節會大噉。屋下人長下笑佢，目珠有安水龍頭，一擰開斯嘩啦啦緊流，毋過難免會堵著噉無目汁个時節。斯像有一擺用電腦打報告，作業速度一路開青燈，就在會完成个時節電腦嘎當機，看等烏疏疏个屏幕，就像佢烏疏疏个失落心情。等到再過開機，資料斯伸著一半，該兩時就恁樣目金金仔奈佢毋何。看著在三更半夜，歸屋下人睡到當落覺，伸佢緊擘嘴，緊流下知差个目汁。

目汁係佢俚摻外背聯絡情感个一種表達方式。所以，所有个

痛惜、期盼、悲傷、感動摻夢想个故事，都做得真實傳達。在佢俚个生活裡背，輒常也會在車頭抑係機場，看著一幕幕無共樣个場景。該片有人送別親人遠去他鄉，離別个目汁張等思念摻期待，還較多个係掛吊摻毋盼得；這片有人插等轉來个好朋友，該歡喜个目汁裡背，淦淦都係再過重逢个快樂摻幸福。佢想，目汁毋單淨係情感个出口，還有一種無形个力量，佢做得穿過時空，傳達溫暖摻勇氣分思念个人。每一滴感動个目汁，都係關愛个力量摻信念。

還細時節，自家當會用使頓屈、打潑賴，去得著想愛个東西。阿姆講，目汁毋係武器，也毋應該係手段。這下佢知咧！目汁係珍珠、係鑽石、係親戚朋友無瑕个愛。

編號 4 號

【岔東岔西】徐汎平原作

記得讀小學該下，日里斯摺搞伴仔共下行路去讀書。無到半點鐘个路程，細人仔咩！哪有好認分乖乖行？總會搵兜齣事來搞。摘花草、捉蟲蛎，這還毋算數。大路町車仔駛上駛下，佢兜斯會看準車影，等佢一過斯跳啊起！麼人係踏著抑係徑著影仔斯算輸，愛分贏个人拘額頭。

放學該下，除忒逛落雜貨店買冰食，幾個人還會湊等去行細路仔、行田塍，堵著路口斯轉彎、過轉彎，三十分鐘个路，硬硬行忒歸點鐘正轉到屋。大人講：「哼！拈囊蛎、打草蜢，岔東岔西，愛行毋行樣！」佢有行啊！行較久定定。

到大咧，不管去到哪隻新城市生活抑遠寮，佢本本當好大街、細路、小巷，滿哪串上串下去探路、看風景。當記得有一擺，自家一儕坐巴士去九份寮，逛過金瓜石黃金博物館，又蹶上長長个礮仔去看神社个遺跡。九份該當有名个老街鬧熱煎煎，一踏啊落斯人尖人、極上極下。總算對街尾鑽出來咧！心肝肚一息斯無想再過對原路躡¹轉去！

¹ 躡：音 liungˋ；竄、鑽。

這時節，堵好看著某某步道个牌仔，該無就來去行看啊好咧！斯跔等礮仔上。無想著，一行起勢，嘎行落山肚去咧。除忒最頭先看著一個像仙人樣个老阿伯仔、較過兜仔堵著一細陣人，歸隻山林斯伸著蟲叫、鳥聲摺微風，還有自家个散氣聲。一下溜崎、一下上崎，遠遠有一細搭頭擺人留下來个屋跡，看著有兜仔淒涼。頓腳下來，臥頭看天，日頭轉影咧，這……算來愛行去哪呢？摸等哼哼跳个心肝，到這下正感覺著：「哎哟！膽大大²哦！」好得，轉一隻彎，堵著山林肚个細伯公廟，打幫伯公指路，過無幾久，斯行到另外一頭个登山口咧。

出啊來，幹轉頭詳細看告示牌，正知講這條山路安到「小粗坑古道」！吉落山个日頭，摺猴硐國小面前、基隆河兩片脣个沙蔗花³晟到金若若仔。佢就在這燒暖个冬下頭，踏上像用金仔鋪設个大路，一路行到猴硐火車頭。過後，又跔等「貓村」个貓仔遊遊野野一站仔，正甘願坐車轉屋。

哼！岔東岔西，毋行斯毋行，一行嘎害人心驚！十年前个戇膽⁴，這下斯毋敢咧！

² 膽大大：音 damˊ tai+ tai+；膽子要大一點。

³ 沙蔗花：音 saˋ zhaˋ faˋ；甜根子草花。

⁴ 戇膽：音 ngongˋ damˊ；因為無知、不作多想而有的勇氣。

編號 5 號

【聽古】廖惠貞原作

還細時節戴姐公屋脣，跔等阿太、阿婆行。阿太成時會渡一、兩個息嫲坐三輪車轉去海口佢个外家，在漁港擺一大籃魚仔轉來。無食忒个，舅姆會用鹽滷變鹹魚，做得食幾下日。

還記得熱天食飽夜，在天時坪，阿姨摺草蓆鋪好，交椅、矮凳仔徙好，伙房个叔婆、伯公乜擎等葵扇出來寮涼。阿太、阿婆在該擘地豆，成時細姪仔乜會搵手。細舅會摺地豆擘一半，夾在偃兜耳砵做耳環戴，愛靚斯毋會試著痛。莊肚一大遍都係田，世大人大概會講耕種个事情，弓蕉仰般翕分佢熟？洋菇愛仰般淋水？打胎个禾仔嗰分塑膠工廠噴煙，禾串冇忒愛仰結煞？三姑婆个豬嫲愛降子囉！無斯講頭擺个事情，搞寮个細人仔會停下來，耳角角仔聽，因為大家斯好聽古，尤其係阿定伯公來寮个時節。

有一擺阿太老癲俵，玄風講愛渡偃兜去海口捉魚仔，堵好該暗晡阿定伯公來寮，佢乜講頭擺戴在新屋永安漁港脣，還細時節，臨暗仔輒輒會跔等大人去沙灘牽𦍻¹捉魚仔，阿公先問：「阿定哥，你兜仰般知愛去牽𦍻呢？」

¹ 牽𦍻：音 kien` gu`；以漁船、曳地網、人力合力捕魚的方式。

「有里長伯會歎嘯²啊！」阿定伯公驚大家毋知歎嘯个意思，又解釋講：「大海螺个尾削忒兜仔，對尾大聲歎，就有嘯嘯嘯——一个聲，大細聽著嘯嘯聲斯遽遽走出來搵手，分做兩片拉網，嘴町大聲緊喊『一、二、三，大力拉！』該搭仔海陸人較多，大家都講牽𦍻。」

「阿定伯公，係恁樣牽𦍻無？」細舅當興頭做出拉網動作，大家哈哈笑。

因為一般客人都戴在山頂，人講：「逢山必有客，無客不戴山。」雖然還細識去海口漁港，毋過無看過牽𦍻。阿定伯公講：「偲俚客家人當擔硬，靠山食山，靠海食海，鄰舍摺屋下人半耕種半打漁，生活還過得去，乜愛靠天公爺摺祖先个保庇，所以偲俚客人尊敬天，感恩田地、大海摺祖先哦！」大家都聽到當入文。

聽阿定伯公講古，想像佢兜協力耕山耕海久遠个古，有節奏个海螺歎嘯聲，大家共下出力牽𦍻收魚仔，看等彩霞染等海面、日頭落海肚，歡喜講笑平分魚仔，家家屋屋都有豐沛个暗餐，這係頭擺漁村生活幫搵个記憶。聽阿定伯公講老頭擺个古，感受著客家硬頸打拚个精神。

² 歎嘯：音 pun du；吹海螺。

編號 6 號

【柿仔情】徐熏嫻原作

毋多知仔又轉到立秋个節氣，大自然也定定仔換山色。逐年秋天，見看著山崑背个柿仔漸漸熟水，心肝頭嘎溫暖起來，就像阿爸惜子个心，浸潤在人生个記憶中轉紅。

這片柿仔林，係阿爸在厝出世該年在屋背後種个。記得阿爸講：「這兜柿仔樹摺你同年，你幾多歲，柿仔樹就有幾多年咧！」想起阿爸係仰般用心來耕種，一冬過一冬个牽成，除忒逐年加減有好收成以外，還較做得飼飽一群番綻肚飢个大細。

樹頂个柿仔恬恬仔轉到紅霞色，摺歸頭樹仔染到紅啾啾仔。看著這兜靚膩膩个紅柿仔掛在高天天个樹頂，跔等風搖搖擺擺已打眼，斯想著還細時節，兄弟姊妹蹶到樹頂摘柿仔个情形，斯像一群細猴仔滿樹爬个生趣畫面，一下工歸頭个柿仔總下搜淨淨，半隻斯無伸。

阿爸个汗水係有機肥料，正做得打出恁結又大嫵粒个柿仔。這兜柿仔毋單淨錫人食，還特別錫鳥仔無斯膨尾鼠來搶食。看著強強就有好落嘴个果子嘎分這兜動物食忒，厝心肚當然毋甘願分佢兜來偷食，所以長下園在樹頭下逐鳥仔、嚇膨尾鼠。這兜事頭

就變成厝兜細人仔落力噴天个事。

有一日下晝，看著阿爸攞等家濟仔行向柿仔園，緊話著阿爸也愛去嚇鳥仔，斯跔等佢後背扭啊扭仔走等去，無想著阿爸拿出紙絡仔，摺樹頂大約五股三个柿仔包起來，伸个斯留分大自然个動物食。

厝看到呆呆，阿爸笑笑仔講：「無相干！人生賺毋足，食毋足。耕種人本旦斯愛看天絡食，有能力種得著來食，分一息仔動物食也係一種福氣！」還毋知頭天个厝哪聽得識麼个係「看天絡食」，總知該係阿爸透風落水辛苦守顧正有好食个果子。

柿仔熟水个季節，阿爸嘎無在咧！摺柿仔摘下來袋落袋¹，斯想著阿爸分日頭晒到紅紅个面頰卵，該係一種深深个思念。這兜柿仔樹年堵年定定仔老，今這下有鳥仔在樹頂做竇，膨尾鼠還係喀喀滾……湊伴來搶食，看著萬物生生不息个生命力，斯像阿爸傳承个柿仔情。厝企在這埕土地上，正感受著麼个係「少食多香氣，多食無味緒」个人情味。

¹ 袋落袋：音 toi+ log` toi+；裝進袋子裡。

編號 7 號

【來去坐巴士】蕭瑞琪原作

這日閒閒無事，想著當久無坐巴士咧，擇日毋當撞日，該斯來去坐莊頭巴士遶遶仔！

莊頭巴士主要係為著服務交通較毋利便个莊頭，分莊民出外辦事、看病、買東西抑係去車頭盤車；或者分學生仔坐去學校讀書；乜做得分來莊頭个觀光客深入在地遶寮。中型个莊頭巴士做得行較細條个路，去到較壁角个所在服務。

一上車，一個頭那毛蓬白个老伯姆當好意講：「後背有位仔哦，煞煞坐下來。」一個中風个老阿伯，雖然手腳毋靈動，毋過一路講笑科分大家聽。還有一個精神無幾好个老人家，恬恬坐在車門脣，目聚聚仔看等大家打嘴鼓。車仔駛到醫院門口，還緊講話个老阿伯摺老人家愛下車，老伯姆又開嘴講：「毋好緊講話緊下車，看好勢來行。」司機當有耐心等到兩儕下車咧，正再過停動車仔。看司機熟絡左片幹正片幹，一下鑽落細巷仔，一下又駛出大路；有時跔等鮮鮮河水个大圳行，有時跔等青里里个田走，實在還生趣。

還有四個八、九十歲个長者，對美國轉來掛紙，跔跔來坐巴

士遶寮這隻講熟事又無幾熟事个家鄉。佢兜去美國打拚五、六十年咧，講个客話還當正板，毋過對緊變化个家鄉，印象早斯濛濛毋真咧。好得司機毋單淨開車技術一流，乜係當湛个解說員。歸路紹介解說，四儕聽到緊領頭，煞猛摺頭擺个記憶摺眼前看著个風景連連起來。有人講：「日久他鄉變故鄉。」但係對家鄉个感情，永遠囷在心肝肚，毋管在他鄉打拚，抑係在家鄉生活，都係為著人生做得還較歡喜圓滿。

想著頭擺去外背讀書，放假愛轉屋下，坐个巴士都尖到淦淦个人，無位仔坐無要緊，下把仔尖到連扳都毋使扳，就企到壁磴轉鉸毋得¹，將就跔等車仔搖搖擺擺到下車。若毋係為著轉一輪屋下，實在無恁大氣命恁樣摺人尖車。等到自家會駛車仔咧，就當少坐巴士。但係，換一種無共樣个方式出入，乜當生趣。

來！來去坐巴士哦。

¹ 轉鉸毋得：音 zhon' gau' m ded / zhon' gau' m ded；不能轉動。

編號 8 號

【月臺】周昱原作

「美濃山川，靚靚風光；醺醺茶香，四季飄揚；勤儉個人，煞猛耕耘；美濃之歌，唱盡鄉情。」美濃，係佢个故鄉，這位有醺醺個人情味，有親切、樸實个客家人。高中畢業來彰化讀大學，對毋識離開屋下恁久又恁遠个佢來講，屋下嘅變成佢深深个掛吊，所以，寮日定著愛轉美濃。因為頭下碼來到生份个環境，還無當慣，更深夜靜在宿舍看書時節，總會想起：「還有幾多日正做得轉去？」「過加幾日仔斯做得食著阿婆煮个菜咧！」

月臺，係佢逐禮拜都會踏著个地方，毋過，回鄉摺離鄉个月臺嘅分佢兩種當無共樣个感受。寮日轉美濃，坐兩點零鐘个火車轉到高雄，踏上月臺該下，總會有一種講毋出个感動，該係「佢轉來咧」个歡喜；等到寮日結束，愛倒轉彰化个時節，爺哀送佢去到火車頭，雖然踏在共樣个月臺頂，毋過，心情嘅係毋甘願，這係「佢又愛離鄉咧」个傷心。

逐擺愛行落月臺个時節，阿姆總係含等目汁三交代四吩咐：「自家一個人在外背愛注意安全」、「在外背毋好摺人訥嘴、結冤仇」、「暗晡頭睡目毋好踢被哦」。頭擺摺爺哀共下戴个時

節，總係感覺阿姆當嘍嘍、吵到人心煩，所以，見擺聽著阿姆个嘍嘍聲，佢斯會悶猝猝應講：「好啦，愛講幾多擺呢？」這下想起來，試著自家實在不應該，該句話應該一擺又一擺傷著阿姆个心。

離開爺哀出外讀書過後正發現著，原來阿姆个嘍嘍聲恁溫暖。老古人有一句諺語講：「爺娘惜子長江水，子想爺娘擔竿長。」這下正式分佢深深感受著，爺哀關心子女个心，遠遠超過佢對佢兜个關心，斯算佢已經大咧，在爺哀个心肝肚，永遠還係吉大个細人仔。

老古人還有一句話講：「還生食四兩，當過死後拜豬羊。」爺哀單淨一個，等到佢成人長大，嘅發現佢兜鬢角个毛緊來緊少咧，做得陪佢兜个時間也緊來緊少。佢一定愛好好珍惜摺爺哀相處个時間，不管幾無閒、課業分人幾煩勞，寮日，定著愛摺阿爸、阿姆、阿婆、姐婆做伴。斯算有朋友湊佢出去寮，佢也會摺佢兜講：「敗勢啦！佢想愛摺寮日个時間留分屋下人。」

編號 9 號

【一領讀書衫】黃美貞原作

該年个新冠疫情，對一群畢業生最大个遺憾，斯係大家單淨做得在線上講正來奈，無法度摺同學共下參加畢業典禮。

有一日，大學三年生个阿德收著母校寄來个電子信，講愛邀請同學轉去參加畢業典禮，正經係當有心。聽校長講，已多該屆个同學試著，無摺大家共下在禮堂唱畢業歌，在校園肚共下結胸花翕相，斯無像畢業。有影，有緣做同學，又有當多讀書、打拚、搞奈个生趣回憶，係難得个情份，所以，學校特別安排在校慶該日，請大家著讀書衫轉來參加典禮。

阿德有一隻習慣，係用毋著个東西，佢會遽遽處理忒，看係回收抑係掉忒¹，所以佢个間房肚總係伶伶俐俐²，無麼个舊東西。這擺，愛尋出三年前个舊衫，根本斯係兔仔角龜仔毛——無可能个事情。雖然學校也有分大家方便个選擇，著白色个面衫、烏色个長褲斯做得，毋過，大家還係會想尋轉該兜青春个蹤跡、珍貴个回憶。

¹ 掉忒：音 tiau' ted；丟掉、拋棄。

² 伶伶俐俐：音 lang lang li+ li+；乾淨整齊。

做阿姆个人，斯算俵仔無講，乜揣得著佢个心思。佢先上網去尋看啊，哪位有賣成功高中个制服，電話聯絡好勢。想著膺身係圓个，用講个毋當用比个，尺寸好勢還愛繡學號上去，黏時帶等阿德平常著个面衫出發，一息都儘採毋得，這斯係阿姆个愛，點點滴滴，來為子女設想。

該日打早，阿德暢靈靈仔著等新衝衝³个讀書衫去學校，看著三年無見著个同學，除忒歡喜還係歡喜。大家共下翕相，講笑，湊等去食晝，斯像讀高中該下。還有同學問起：「阿德，你个讀書衫仰還恁新，一息汙點都無？摺印象中差當多呢？」知得係阿姆个用心以後，大家雖然感覺已超過，毋過還係當欽羨，原來時行个儀式感斯係恁樣形啦！

一領讀書衫做得分俵仔留下恁好个回憶，實在當值，最重要个還分後生人了解，把握機會創造回憶，該種價值係用錢斯買毋著个。

³ 新衝衝：音 sin` chung` chung`；很新的。

編號 10 號

【食飯个禮貌】曾雪蓉原作

有一句話講：「一方水土養一方人。」逐隻地方都有自家个文化還有習慣。在恁多个風俗裡肚，「食」个禮貌文化做得講係生活當中盡重要个一部分。

還記得舊年，嫁去日本个滿姑，請佢兜歸屋下人去佢屋下遶寮。到了日本，食飯个時節，「山田」姑丈拿起酒杯，湅一杯酒分阿爸，湅好以後，姑丈撈酒罐仔放在桌頂，就笑咪咪仔看等阿爸，阿爸也對等姑丈緊笑緊領頭，兩儕就恁樣笑等對看。過無幾久，滿姑發現著就講：「大哥，日本人在咁酒个時節，係習慣愛互相湅酒。頭下山田湅一杯酒分你，你這下乜愛湅一杯酒分佢啦！」滿姑講忒以後，佢兜正知原來係恁樣哦！阿爸煞煞湅一杯酒分姑丈，嘴町緊用日本話講：「請、敗勢」。這種「做人客」尊重主人，一旦來食酒个規矩，佢想就係一種「食」个禮貌文化，也係老古人言講个：「入莊隨俗，入港隨灣」个生活呈現。

「做人客」个時節，愛曉得尊重主人个習慣；「請人客」个時節，又愛仰般做呢？

佢屋下有請印尼阿妹來搵照顧阿公，這印尼阿妹佢个名仔安

到「阿妮」。「阿妮」平常時當煞猛，除忒照顧阿公，還會做衫褲。有一擺「阿妮妹」做一身當靚个衫裙分佢叔姆，佢叔姆為著愛答謝佢，就請佢食飯。佢陪「阿妮」去隔壁叔姆屋下，坐啊下去，看著桌頂有焗豬腳、豬腸炒薑絲，又有豬肚鹹菜湯，全係叔姆个手路菜，乜係佢兜食慣个客家味緒，菜色多，正經當豐沛。毋過佢叔姆一下無想著「阿妮妹」係印尼人，佢無食豬肉。佢行去灶下撈叔姆講，佢「唉喲」一聲，斯遽遽炒別項菜兜上桌。佢黏時就想：「下二擺係講愛請人客，愛詳細注意人客敢有特殊个食飯習俗，正毋會好意變壞意來失禮。」

「食飯个禮貌」係一個人好修養个表現，佢提醒自家在這方面毋好恁儘採，不管係分人請抑係請人客，定著愛做到「有禮有節」。